

崔舍人玉堂類藁

崔舍人玉堂類藁卷第三

批答

賜劉懋上表再辭免加食邑食實封不允仍
斷來章批答

朕比卜景至承神嘉壇禮成休明福嘏綏輯豈曰予
一人之能今靈盞之下不敢遺小國之臣而吾戚畹
之愛旣親且賢如卿者乃以多辭何哉惟天休之不
可稽惟朕命之不可格往宜祗服毋復重陳

賜姚憲上表再辭免除參知政事不允仍斷
來章批答

朕祇承慈訓嗣守慶基有綱紀萬事之緒而未克成
有經營四方之志而未克遂遐想遠慕予心漠然深
求治原匪賢曷濟卿方大之德通明之資迪知朕衷
登進樞筦審固足以定幾事淵微足以贊明謨經之
遠猷倚以修輔夫才難適於時會道常待於世興繁
欲恢盛大之圖馳寥廓之見自非開亮卓偉邦之瓌
英孰與共吾事哉僉曰汝諸政將安往趣其祇服汔
以仰成

賜葉衡上表再辭免除端明殿學士簽書樞
密院事不允仍斷來章批答

負經世之才者常畫於無志懷許國之志者又病於無才才志具矣時不爾與亦未見其能成功也卿學術宏深器資方重練達萬變而智與幾會忠實一意而謀皆予同召從留都進長禁路察其可任斷以不疑今天下之事所當爲者衆矣朕方夙夜宥密不皇康寧求其遠且大者亦惟爾左右帷幄之臣是咨是度濟于丕成儀圖壯猶參翊神務素所注東宜無踰卿亟奮而庸助起予治區區謙避靡懌厥聞

賜王友直上表再辭免除奉國軍節度使加食邑食實封不允仍斷來章批答

朕敷求良將槩見前書若周亞夫之治軍足嚴國體
如祭征虜之潔已自得士心豈無若人用勸武服乃
瞻在位時維俊臣卿性稟沉雄材資敏銳總予周衛
賴爾壯猶謹廉尤務於無私訓練悉聞於有紀載觀
規畫深協眷懷惟器與名已峻齋旄之拜能謙必豫
尚披遜牘之陳宜卽欽承毋勤重請

賜葉衡上表再辭免除參知政事不允仍斷
來章批答

朕嗣隆丕緒寅念永圖朝忘食以就功夜振衣而思
治疇若予采亦惟直方持重之臣用又我民俾有安

樂得賢之福卿器資淳固識慮淵通才周文武之宜
學洞古今之蘊忠勤一節自結朕心出入百爲浸崇
人望比召從於帥闡卽登踐於樞廷謀猶具宜風績
逾劬肆晉參於大政實素定於至懷碩大無朋當愈
堅於獨立溫恭有恪尚益效於同寅方倚佇於交修
奚游形於冲避令維無反時乃可行宜亟欽承毋容
重請

賜徽猷閣學士太中大夫提舉佑神觀楊傑
上表再辭免除靖海軍節度使簽書樞密院
事進封鴈門郡開國侯加食邑食實封不允

仍斷來章批答

朕續綿慶基規恢大業廣運文武庶底安疆之功延
覽英豪共圖長久之道卿材猷敏達識畧精明夙濟
美於勲門荐宜勞於禁路克有休績具昭遠猶肆授
鉞於將壇俾贊謀於樞極輟萬里張旛之使副一時
虛席之求疊疊繁機正有資於協慮謙謙小節宜無
事於多辭亟服寵休勉思報効

賜曾覲上表再辭免除開府儀同三司依前
武泰軍節度使提舉萬壽觀進封信安郡開
國公加食邑食實封不允仍斷來章批答

朕誦伐木之詩而見故舊之情覽康誥之書而念耆
成之益乃九月朔日誕告于廷而羣公卿士罔不是
孚者識朕此意也卿率性溫恭挺身勤忠臨寵架懼
陳辭愈明朕烏得而聽之邪漢之南陽舊人唐之秦
府僚吏其在當世皆蒙顯榮卿何疑焉

賜皇子魏王愷再辭免除改判明州軍州事

加食邑食實封不允批答

朕紹承休命光撫庶邦永念先王疆本根之道亦惟
有名宗臣藩保扞王家乃輟吾賢嗣往臨南服亦旣
累歲宜更治民是用有四明之命茲實國體非以私

卿也且風土樂嘉可以坐鎮道里順易便於來朝尚何辭焉

賜葉衡上表再辭免除通奉大夫右丞相兼樞密使進封東陽郡開國公加食邑食實封不允批答

朕惟天子君臨萬邦亦惟有一心同德之臣左右厥辟用保乂于庶民顧朕弗逮博求于有位之士咸曰汝衡純明淵通方大宏毅是能輔朕有爲于茲世乃戊申之命告于在廷靡不維允爾乃陳德弗及願遜于在列之賢我聞曰可愛維時可圖維勲若涉大川

今予暨爾其濟爾克欽承我命往哉益懋乃猷乃罔
于孚不休

賜葉衡再上表辭免除通奉大夫右丞相兼
樞密使進封東陽郡開國公加食邑食實封
不允仍斷來章批答

朕惟朝廷正而王化成儒術行而治功起朕攷擇相
位灼求俊心必詳試以觀其能又悠久以成其望於
是舉而加之百官之上其所注意則非一日之積也
卿蘊經綸之學濟通敏之資簡于深知迄此大用今
庭告之下敷聞四方乃欲徇撝謙之節而拂素定之

懷執無益之辭而格已成之命則豈可哉祗迪予衷
亟踐乃位

賜李彥穎上表再辭免除端明殿學士簽書
樞密院事不允仍斷來章批答

朕總覈庶治作興盛圖日來登明選公之命庶乎人
心之所謂當然者聚此衆雋彊吾本朝維時大享越
有希遇卿迪忠忱之度秉端毅之資歲時周旋望實
休顯積是素眷迄于延登協升大猷陪輔密論乃陳
情懇激至于辭朕命者再則豈見行可之誼哉亟宜
欽承毋或謙避

賜少保右丞相史浩再上表辭免玉牒所進
書回授轉官依例加恩不允仍斷來章批答
朕惟尊祖嚴宗王道之先務也日者有司以成書來
上乃祖宗之慶源大政是在朕覽觀崇奉差錄賢勞
今賞典之下自丞相始乃執謙辭隆及於再三而不
已且事關宗廟而恩不加於大臣得無傳聞重朕之
不逮宜體茲意勿庸有陳

賜史浩再上表辭免除少傅保寧軍節度使
充醴泉觀使兼侍讀加食邑食實封不允仍

斷來章批答

朕歷觀古昔之盛深歎君臣之全漢重耆儒退乃榮
於就第周優上宰歸仍卽於居豐卿國之元臣世之
大老秉統庶事儀刑百寮逮其言歸留以自近禮絕
今比恩逾前聞豈惟台路之光榮時乃朝家之盛美
將流芳於簡冊永示勸於臣隣固出至懷詎容多避
賜趙雄上表再辭免特授右丞相正議大夫
加食邑食實封不允批答

朕惟宰相之任厥惟難才非盡古之道不足以有謀
非達今之宜不足以有立固嘗中夜以興當食而歎
思得一世之人傑足以濟時成務者俾任吾事天若

興世國豈無才卿蚤由禁途自結朕眷以陳平之智而復重厚可任以元齡之謀而能果斷必行朕所注意非一日也渙號已頒衆言維允功業之盛四面以觀區區謙辭終不得徇

賜王淮上表再辭免特授樞密使太中大夫加食邑食實封不允批答

朕惟帝王之盛未嘗去兵是以爰自卽位蚤夜以思啓處以圖其於三軍五兵之事不敢一日忘也乃若廊廟輔臣股肱同體實賴講謀究度以旦夕承翼濟予于丕庸卿毗佐累年鍊達庶事鎮物以重事上以

王堂集卷之三十一
誠具鼎才之實而養以剛中積坤德之純而發以方
大朕所嘉賴匪卿而誰專付重權益懋成績萬微之
會悉以屬卿宜宏大猷母事小節

賜昭慶軍承宣使提舉佑神觀士欽上表再
辭免保康軍節度使加食邑食實封不允仍

斷來章批答

朕惟親親之道先王所以化天下厚人倫也卿裕和
肅艾爲時老成秉德在庭克自祗畏比攷閩闕宜秉
節旄遂涓剛辰已渙邦號朕於宗族恩靡不用至是
積勤累善歷十年始進其官則亦惟舊憲是若願於

予心尙有慊然而卿猶欲有辭可乎卽宜欽承毋庸
重請

賜太中大夫樞密使王淮上表再辭免曾預
修纂隆興以後日曆奏成篇秩特轉行一官
依例加恩不允批答

朕臨御四海閱日彌長常畏過行以羞太上皇帝之
畀付今儒館言繫日成書重循菲涼將何以傅示萬
世卿蚤以秉筆與游道山逮茲終編實在政路宜有
褒賞用昭勤勞昔唐太宗嘗曰朕監前代進善人遠
羣小亦欲史氏不能書吾惡也今三者之事方與卿

守之執謙小節此何望焉

賜正議大夫右丞相趙雄上表再辭免曾經
預監修纂隆興以後日曆奏成篇秩特轉行
一官依例加恩不允批答

朕觀西漢故事凡郡國計書先上太史公副上丞相
蓋天下之事太史得書之丞相得行之卿舊游承明
多所紀述迨踐政路復專總提今簡編告備而適在
相位以前日見聞之所及知當時得失之必書宜思
爲朕彌縫輔贊置於無過之地則予是望一官之賞
此何辭焉

賜降授朝請大夫參知政事錢良臣上表再
辭免修纂隆興以後日曆奏成篇秩特轉行
兩官依例加恩不允仍斷來章批答

朕選大雅之彥萃承明之庭記事載言庶有傳於悠
遠提綱振領可無賴於裁成卿經世通儒與邦賢輔
比觀剡奏洵就信書維十六年歲月之長至一千卷
簡編之富史法不隱方深惕畏之心帝德罔愆終藉
彌縫之益宜祇寵命毋執謙懷

賜正議大夫右丞相趙雄再上表辭免曾經
預監修纂隆興以後日曆奏成篇秩特轉行

一官依例加恩不允仍斷來章批答

朕惟繫日之書傳信萬世永言不逮賴太上之訓獲保丕緒功烈成就未有慝志今儒館成書何可紀述丞相朕所倚以經遠業建太平所宜爲朕稽參政事祈進治功庶幾大書特書吾君臣咸有無窮之問進階之寵是有故典曷爲避之堅乎覽章歎嘉終不得徇

崔舍人玉堂類藁卷第四

批答

賜太中大夫樞密使王淮再上表辭免曾預
修纂隆興以後日曆奏成篇秩特轉行一官
依例加恩不允仍斷來章批答

朕惟祖宗稽古右文同符三代今朕重惜名器一豪
不輕乃茲成書沛然下賞舊勞新績纖悉靡遺所以
尊儒術重國體也卿蚤以華望與游英躋凡今纂修
咸昔端緒乃擢章之來上願置勿錄雖卿執謙之美
賞國之典朕敢廢乎令至亟承辭多無益

賜正奉大夫右丞相趙雄上表再辭免勅令
所修進一州一路酬賞格法了畢特轉一官
依例加恩不允批答

朕厲精政理茂講民宜分道置州既外釐於羣吏視
功詔賞乃中秉於至權曾是攸司漫無定式重輕視
於成牘予奪付於私情比命更修要歸至當凡具書
於甲令悉旋達於乙觀酌求其平制定其可肆茲告
備將以常行卿酬酢繁機迎見立解練達大體深計
遠謀復提宏綱汔就信典格令刪定元齡隆至治之
風紀律設張黃裳贊中興之業茲推茂渥庶答成勞

卽宜欽承豈必多遜

賜中奉大夫參知政事錢良臣上表再辭免
勅令所修進一州一路酬賞格法了畢特轉
一官依例加恩不允仍斷來章批答

朕端臨萬方分建羣吏勸以慶賞程其功能幅員旣
長維險夷善惡之各異官職相序亦繁簡重輕之不
同其於制爵以待庸當亦隨宜而辨等因循有日汗
漫無文科條惑於盈几閣之書姦弊肆於長子孫之
吏嘗深浩歎卽令改修爾有司存予皆親覽至繼至
悉維允維平卿偉業憲邦宏才濟務達于德意定此

法章炳若丹青已無疑於承用堅如金石方有賴於
持循茲畀茂恩固難過遜

賜右丞相趙雄上表再辭免秘書省進呈會
要了畢提舉官特轉兩官依例加恩不允批

答

建邦者必有典傳世者莫如書三墳遠而皇綱莫尋
六官分而王制盡在乃者功施舊省篇奏法官接十
世之豐規聚一朝之不則既用覽閱良深歎嘉卿全
才憲邦宏量鎮物整持法度大勞載於朝廷潤澤典
章餘事形於簡冊凡茲明備咸出裁成優遷文階率

用舊制續太初之後遂及全書覽正觀之元方思終善而乃媿於亟拜爲此牢辭徒專謙牧之風殆拂忠規之望

賜參知政事錢良臣上表再辭免秘書省進呈會要了畢禮儀使特轉兩官依例加恩不允仍斷來章批答

國家制度託簡冊而傳朝廷禮文隨事體而重乃者三館之彥衰次今事踵續前書首篇所載乃皆親庭光華曠異之禮朕所以因其來上鋪張物采焜耀聽觀凡以章洪休侈巨典也卿才資通明德器安重際

于亨運總此盛儀肆推異恩已首衆雋而乃執謙陳
辭至於再而未受則豈知朕意之所在虛固有彝規
當卽祇服

賜通議大夫樞密使王淮再上表辭免提舉
經修會要特轉一官不允仍斷來章批答

歷求古先咸有典則觀舊經於魯國僅得習傳問今
事於崔琳徒資誦記越我熙明之代見於總會之書
敢言菲射遂踵前迹卿深純端亮簡重寬明策盟府
之勳聊先翰墨定籌帷之畫當究規圖疊聞謙陳深
援近比固自有說豈必皆同引稠疊而辭旣足以昭

名器之不公近量勞動而受又足以示朝廷之無廢庸各行其心俱利於國宜體眷意卽收遜章

賜少傅保寧軍節度使充醴泉觀使兼侍讀史浩上表辭免已進會要經修不經進提舉官特轉一官令回授不允批答

朕秉執大柄照臨羣臣片善靡遺寸長不置而况元老大儒勲在翰墨茲而弗錄謂疏遠何卿涉道深純函德忠厚曩在宰路具宣賢猶乃者巨典告成中外同喜參條功緒褒及舊勞朕惟卿言之不釋固已徇謙志而移恩于族親矣猶遜不當毋太過乎

賜少傅昭化軍節度使元醴泉觀使嗣濮王
士暢上表再辭免除少師加食邑食實封不
允批答

朕惟親親人道之要也今本支蕃衍未逮全盛之日
顧瞻大廷見此耄艾黃髮在位維喜康共思有以大
顯榮之固朕之心也乃者禮成合官福祿來下與我
共此無逾茂親且亞師之命近時宗族之所未有高
秩厚禮舍王孰宜而又何辭焉

賜少保岳陽軍節度使元萬壽觀使永陽郡
王居廣上表再辭免特授少傅加食邑食實

封不允批答

朕惟厚陵諸王有若端獻聞望光美儷昔間平天錫
善祥十子競爽流澤未遠逮其聞孫秉德在廷厥猶
翼翼茲朕之所嘉卿今竣祠路寢配天敷澤非優異
之恩亡以示天下隆親而尚賢也庚子之命尚庸辭
乎

賜少傅昭化軍節度使元醴泉觀使嗣濮王
士勗再上表辭免除少師加食邑食實封不
允仍斷來章批答

朕稽古彌文對時亨運玉帛萬國夙尊布政之堂簫

韶九成肇享交神之室既荷天休之應遂均惠術之
行卿邦家茂支宗族元老紹百世濮園之祀參九霄
仙館之遊因緣慶恩推昇懋典錫文武之胙當厚耆
明之賢篤魯衛之親乃先惇睦之道茲由素定奚可
終辭

賜少保岳陽軍節度使元萬壽觀使永陽郡
王居廣再上表辭免除少傅加食邑食實封
不允仍斷來章批答

朕肇稱元祀鋪究上容多士駿奔走以在廷四方大
和會而觀禮維時顯相多宗族之蕃昌迄此休成諒

神靈之歡喜既誠陳而享洽遂惠均而政行卿和裕
凝資寅恭秉德被溫貂而就位與華爵以交神既右
饗之不擁繁釐之下乃商賚爾超登亞傅之崇渙號
已孚謙辭猶至固出眷懷之異可專擣挹之高

賜宣奉大夫右丞相趙雄辭免玉牒所進書

了畢提舉官特轉兩官依例加恩不允批答
朕惟祖宗成功盛德儼美皇王乃金饋玉版之書所
以勒休垂鴻未至純備比者深詔執事哀次纂述傳
示萬世越四月丙戌有司以成書來上文富事核對
越在天休光美實照映日月朕甚嘉之卿方大之□

王堂集卷六
六
渾深之度秉統萬務仔肩壹心今寶典告成恩言□
下而乃陳見悃悃願止勿當且吾於褒賞非過也丞
相顧安取此雖知素謙得無體朕所以厚前烈重宗
廟耶前日之命趣當承焉

賜通奉大夫參知政事錢良臣辭免玉牒所
進書了畢禮儀使特轉兩官依例加恩不允
仍斷來章批答

朕惟國家襲唐憲度鏤玉成書祖功宗德交映簡冊
舊制領於宗寺典以侍臣承平日久庶事大備越大
觀間乃侈盛容物至置使以領之所以昭謨烈重宗

廟也卿負通明之才居弼諧之任維正庶事調娛萬
徽今大典告成寶儲崇奉簪纓駢萃羽衛紛陳時維
令儀陟降上下不爽于度沆漆厥成記曰禮無不答
不有優賞曷以旌使範之勞乎超晉文階增加采戶
厥有故事卿無辭焉

賜宣奉大夫右丞相趙雄再上表辭免玉牒
所進書了畢提舉官特轉行兩官依例加恩
不允仍斷來章批答

朕惟嚴饒玉之書集汗青之績事大者體必重功隆
者報乃豐卿黼黻王度之文淵源聖域之學闡釋□

訓鋪張烈光旣成信書宜錫茂典而乃剡奏疊□□
誠益明上歸美於菲躬下委勞於羣彥欲以一謙之
節立於百辟之先朕惟侯霸善錄遺文魏相好陳故
事皆輔乃辟克成厥功竝流英聲尚在良史卿其崇
厚道德廣予以慶曆之寬仁招延俊賢輔予以元祐
之正直明明成德赫赫當今是將底於大寧豈不愈
於小諒宜體至意卽收遜章

賜太中大夫試吏部尚書兼翰林學士承旨
兼侍讀兼太子詹事兼修國史周必大上表
再辭免除參知政事不允仍斷來章批答

朝廷延登常取羣望廊廟重任宜聳具瞻揚綰用而
宿貴改觀王陽進而善士生喜朕選建碩輔翼宣大
猶國皆曰賢政將焉避卿初終有守本末無疵以其
纘密而栗可以參訃謨以其中正而通可以經丕務
俾釋銓筦遂躋柄塗人之信道固將有行國之用儒
時乃維允猷爲茲始遠近所觀方朕衷委重之意深
亦衆志望賢之責備勉摠素組汙濟熙圖謙遜之章
止毋來上

賜朝請郎試刑部尚書謝廓然上表再辭免
除端明殿學士簽書樞密院事不允仍斷來

章批答

朕綜持大柄延攬羣英修政於國家間暇之時基命於夙夜宥密之地長撫遠馭曷登濟於丕圖同寅協恭乃詢求於成彥得諸民譽近在禁塗卿賦有用之才抱無窮之學智略輻湊予知其籌慮必精識度淵長予察其規摹必遠乃進右府庶彊本朝名稱位者勿辭資逢世者難失當體大有爲之志先求不可勝之圖迄成茂功終藉長策區區謙避所不必聞

賜宣奉大夫右丞相趙雄上表再辭免進四朝正史志提舉官特轉兩官依例加恩不允

批答

朕惟天胙昌圖世承明德例凡嚴備已全五聖之書
聞見紛綸尙闕四朝之記深詔宰輔廣延儒英趣裁
信編沆就大典匪提綱之有道殆汗簡之無期卿勞
大而處以謙德全而加以畏懇辭上賞敷暢忱誠維
國家之德澤素深維祖宗之規摹可考垂將來之法
豈專比事而屬辭慰在天之靈尙勉建功而立業當
收謙節益邁遠猶

賜通奉大夫參知政事錢良臣上表再辭免
進四朝正史志禮儀使特轉兩官依例加恩

不允仍斷來章批答

朕紹遵丕緒闡釋先猷嘗申命於儒臣俾趣裁於信
史成編來上盛典時行端宸宸以鋪觀闢寶儲而崇
奉簪纓駢華羽衛紛陳無言不酬旣表提綱之績有
儀可象遂褒詔禮之勞卿望重民瞻謀參天緯方正
身而厲俗乃引義以辭榮事固協於典常體亦優於
眷遇已孚休命難徇冲懷

崔舍人玉堂類藁卷第五

批答

賜通議大夫參知政事周必大上表再辭免
經修四朝史志轉一官不允仍斷來章批答
朕鑒于往昔咸重史臣觀厥成功率惟久任張華尙
誇於再至蔣乂嘗越於十年當時推榮後世稱□□
懿文華國雅望表民自窺典籍之藏逮聽星辰之履
咸專載筆遂究長才力倍羣英功先衆作爰優頒於
恩典奚固執於謙規俾下多興廉識分之風雖可嘉
於卿志將國有吝賞廢勞之舉亦殊失於予心當□

欽承毋庸重請

賜通奉大夫樞密使王淮上表再辭免四朝
正史志了畢經修不經進前權提舉官特轉
行一官不允批答

朝廷慶賞必始大臣宗廟策書當嚴正史卿道躋闕
奧文擅統盟以其忠純則執簡無愧辭以其審重則
纂事無遺實向司載筆具罄賢勞才學識之長深見
討論之善清緝熙之典遂符祖述之心疊覽謙陳願
辭褒進方藉謀謨之益可忘體貌之崇綸綍頒始
昭前績旂常登紀尚廣後圖勉卽欽承毋庸固請

賜少傅史浩上表再辭免進讀正說終篇特
轉一官不允批答

朕登延宿儒講誦先訓金聲玉振實聞道德之原日
就月將遂畢簡編之富卿器全方重學貫中庸道予
以正大之言廓予以寬厚之論凡廣廈細氈之邃所
以指陳庶咸平景德之隆及於身見逮茲卒業嘉乃
輸忠爰首下於褒康庸增光於眷遇遽披奏達願返
恩榮雖卿素懷斂分收涯之心豈朕可廢崇儒重道
之禮宜承優典卽畧冲章

賜少傅史浩上表再辭免除少師依前□□

軍節度使充醴泉觀使任便居住進封魯□
公加食邑食實封不允批答

朕惟明哲君子之攸貴行藏聖人之所難壽考康寧
方膺於備福雍容進退復保於令名想聞前風慨歎
希遇卿誠信孚于天下勤勞載于朝廷留連燕間密
勿議論縱其已老猶當賜几杖以從遊寧此未衰乃
遽懷山林而獨往雖溫諭之已至迄冲規之不回豈
無茂恩用致優禮崇高節則風俗厚體耆德則名器
尊奚爲固辭尚復勤請宜略謙柄卽承寵章

賜少傅史浩再上表辭免除少師不允仍斷

來章批答

元老大臣世所視法進退之際聳聞四方其所寵榮
繫國大體高秩厚禮朕匪敢私卿昭厲世之規抗絕
塵之見引誼宏遠陳辭懇誠朕惟尊耆老仁也體舊
相禮也崇高節義也今制冊之下中外固知朕意之
所在矣可以一謙而廢三美乎宜承茂恩勿復有□
賜鄭聞新除四川宣撫使再辭免除資政殿
大學士不允不得再有陳請詔

朕眷懷全蜀逸在西陲惠寧一方孰專制閩之寄願
瞻四近迺輟贊元之賢考繹僉言稽參懋典爰□□

於祕殿庶倚重於壯猶將疾而驅已嘉忠蓋益□□
牧尙執勞謙成命旣行多辭徒費夫文武惟其所用
當應之不窮功名隱於無形必施而後見使朕護安
疆之效繫卿慨久大之圖則君臣俱榮中外同福區
區小節豈所望哉宜卽欽承毋復有請

賜中大夫提舉江州太平興國宮林安宅辭
免除龍圖閣學士不允詔

朕取才不責其備用人必全其終豈嘗參宥密之謀
可獨後褒榮之典卿蚤揚時譽晚踐政塗坐一眚以
去朝積累年而置散肆因郊資稍進寵名雖君子允

迪於勞謙益堅素守顧大臣當優於眷禮難廢彝章
姑畧多辭亟宜祇服

賜武康軍承宜使新知揚州王琪辭免差充
荆鄂駐劄御前諸軍統制不允詔

朕修明戎備宜暢王靈我得上流爰分屯於勁旅吾
不中治乃全付於英賢卿夙負壯猶屢收多績較□
淮甸之寄往總武昌之師蔽自朕衷協于輿論蹈□
義者急於報國志功名者樂於逢辰卽宜疾驅毋□
謙避

賜錢端禮陳乞奉祠不允詔

朕敷求前古致理之原深戒刺史數易之弊□□□
吏咸勉奮於民庸雖爾大臣亦徐觀於治效卿宏才
經世令德憲邦夙懷康濟之能益稔耆明之譽嘗弼
予治參周官小宰之聯往撫乃封卽禹穴神臯之地
教條孚洽閭里又寧方倚佇於報成奚遽形於引退
望之尊者豈出處之當易政之優者尚始卒之是圖
祇若朕懷亟安爾位

賜史浩再辭免加食邑食實封不允詔

朕欽柴泰壇歷祿清廟嘉應竝見知精意之交通慶
賜遂行庶純禧之普洽卿負時宿望爲國元臣屬修

美報之儀適阻駿奔之助稽諸彞典錫是徽章惟符
不于其祥敢矜獨鄉乃祿必當其位奚用固辭宜卽
祇承毋勤重請

賜中大夫參知政事姚憲辭免差同詳定一
司勅令權監修國史不允詔

朕惟明法審令厥有彞章昭德紀功是存信史博
宏達申命纂脩庶幾藏在名山成一經之通體亦使
視諸故府立萬代之洪綱非吾大臣誰與領此卿遠
識周乎世務清規邈乎儒猷肆疇乃庸俾圖厥政遂
付鉅典式觀全能三王之法合人情豈無資於折衷

五帝之書言常道正有賴於裁成任既協於當仁□
亦循於近比亟其祇服毋拂予聞

賜吳拱上表辭免進封武功郡開國公加食
邑食實封不允不得再有陳請詔

朕甚重名而貴器比者按圖規土出名鎮之節而畀
之爾亦惟爾先世之忠烈乃身之勤勞咸在王家不
可廢賞念爾先仁也疇爾勞義也一舉而兩善得於
是無愧爾乃陳德弗稱願還之少府之官豈朕意哉
令出惟行雖辭無益

賜宣奉大夫右丞相曾懷乞解罷機政不允

詔

朕惟成周之盛于時大臣之賢至歷四世耆德之尊
皤然在位不聞有謝事之辭亦不聞有遺年之議今
朕不逮所與共治者惟是老猶碩輔秉誼承翼克將
予于有濟爾乃陳力不及願致吾機政而歸朕豈以
力望丞相哉舉綱總要優游廟堂論道之餘亦足□
逸

賜右丞相曾懷再降詔不允不得更有陳請
詔

朕惟天下之事誠使老者謀之壯者決之雖聖賢不

能易矣朕率是道以用人爰得耆輔延登廟堂敷□
令猶凝亮嘉績方日虛已以聽庶乎治功之隆遽茲
懇辭欲以閑請豈體朕羞耆尚賢之意乎比歲宰輔
之臣病於數易今四海具瞻之地爰立未久又復□
去人斯謂何祇服眷懷亟起就位

賜資政殿大學士通議大夫知紹興軍府事
兩浙東路安撫使錢端禮辭免除觀文殿學
士不允詔

朕觀古者君臣交通中外均壹有若姪且實勤西人
之思乃如畢公卒成東郊之治朕甚嘉之卿秉誼純

明受材宏達曩在政路邦其安榮肆典輔藩民以綏靖觀文舊紫宸殿也禁廬邃嚴儒職隆重近時唯前宰得除今舉爲爾寵表善政而崇舊德庶幾致其優異者焉宜略謙辭亟圖祇服

賜資政殿大學士通議大夫知紹興軍府事錢端禮再辭免除觀文殿學士不允不得

有陳請詔

朕獨觀化原詳覈吏治宅乃牧而敷政維以乂民選所表而懋功庶其自近卿蘊高明之學稟方重之□久典輔藩式崇賢望誕布中和之化肆宜寬大之□

爰嘉美庸用錫殊寵舊臣作鎮衆所具瞻信賞時□
餘將交勸未體褒康之意尚勤謙避之辭成命已孚
多言奚益

賜王友直辭免除奉國軍節度使依前殿前
副都指揮使加食邑食實封不允詔

朕規長策以馭邦乘至權而厲世整軍經武維千戈
之省厥躬念功簡勞必爵祿之當其位卿志懷沉遠
材力敏彊蔽自朕心總茲禁旅持已益知於廉謹治
軍尤見於方嚴盡革弊原具殫忠蘊肆優加於褒典
庶風厲於羣臣賞不踰勲已允諧於輿論言唯作命

諒難徇於謙懷祗若寵榮勉圖報禮

賜朝請郎權吏部尚書兼太子詹事兼侍讀
李彥穎乞除一在外宮觀或待次小郡差遣
不允詔

朕敷求羣材列布庶位乃眷禁嚴之長有如端亮之
臣庶幾共濟遠圖詎可獨全小節卿性資莊重氣守
剛方銓曹稱通簡之風經幄見淵源之論仍資正學
俾輔儲宮具孚令猶休有崇望遽披遜牘備著誠忱
虛已待賢維朕志之不貳引疾辭位豈爾心之有遐
就使欲其名推止足之高寧不念乃后失老成之□

三復來奏懽然莫從

賜奉國軍承宣使士矩辭免特差知南外宗
正事不允詔

朕以不逮奉承聖緒之休永念本支之盛所以鎮萬
民彊王室也乃眷南顧有繁吾宗肆疇懿賢命以董
正卿性資純茂德度粹溫周旋禮義之經被服詩書
之訓考屬稽行無逾汝宜方崇公族振振之風難徇
君子謙謙之節亟其祇服毋復過陳

崔舍人玉堂類藁卷第五

崔舍人玉堂類藁卷第六

批答

賜少傅保寧軍節度使充醴泉觀使兼侍讀
史浩辭免已進會要經修不經進提舉官特
轉一官不允詔

朕緬循前聖優禮舊臣日者三館成書肇自初載朕
開卷覽觀而良規善政大率多卿之講畫所以沛然
下賞加地進律豈直故事固有至懷卿清明端誠忠
厚亮直旣已委功名而自逸乃復臨寵利而不居比
以相貳大臣慮於恩光狎至朕固勉從其請而成□

美矣卿何說而亦辭乎當體眷私毋專謙節

賜特進觀文殿大學士判建康軍府事充江
南東路安撫使兼行宮留守陳俊卿乞許以
歸老鄉里不允詔

朕惟金陵都會寄重勢嚴外制帥權內司宮鑰維時
選任當屬重臣乃者召卿遠藩命以往鎮處得地所
人皆曰然卿高明踏中惇大成裕譬諸喬嶽鎮靖一
方不勞發舒雲氣自潤朕聽言興願無復勤憂武克
文馴繫卿是賴乃茲所逸殊異朕心卿其虞神省慮
善總大綱表裏江淮徒得君重鄉閭之請所未欲聞

賜少傅保寧軍節度使元醴泉觀使兼侍讀
史浩再上表辭免已進會要提舉官特轉一
官令回授宜允詔

纂事成書是垂丕則厥勞詔賞固有舊規曾褒崇之
未加乃謙畏之靡已卿純誠忠國厚德表民始迺
號之文終避貶恩之命適張良封留之願素尚□□
覽晏嬰辭邨之言益欽冲節勉下俞旨悉收寵章□
朕報功之心成卿厲俗之美

賜中大夫程大昌辭免除敷文閣直學士與
郡不允詔

儒職朕所甚重也至於敝西清之棟宇聚永祜之文章通直其間豈輕畀諸卿受才雋明秉誼宏亮優結朕眷超登禁塗綜持銓衡甄叙人品維日浸久厥勤茂宣忽披懇陳願卽閑逸朕以其積勞侍從遽去朝廷參圖寵章增重郡寄寶儲延閣于是爲宜而何以辭焉

賜龍圖閣直學士中大夫成都潼川府夔利州路安撫制置使兼知成都府事胡元質辭
免除敷文閣學士令再任不允詔

朕厲精政理選建邦侯井鉞參旗旣倚价藩之重雲

章奎晝遂超儒職之高卿文補皇猷智經王體昇以
蜀鎮出於朕衷而能宣道威德教條堅明詢求疾憂
議論懇惻去國萬里居坤一隅豈不念於爾勞顧莫
當於予寄宜服喪進母懷滯留迄圖大成尚有懋賞

賜太中大夫諱禮部尚書兼翰林學士兼侍
讀兼太子詹事兼修國史周必大辭免除吏

部尚書兼翰林學士承旨不允詔

綜銓省之公衡道內庭之密命攷皇朝熙寧而上實
爲台路之官閱唐室元和以來專待禁林之老班高
地近事重職清曾崇朝而竝除乃曠代而罕見卿懿

玉堂書葉卷之二
文追古亮節表時英英人物之宗憲憲邦家之望久
在近禁灼知俊心稔光大之德而尊榮朝廷藉端醇
之度而領袖侍從優錫顯命竄超常倫當卽欽承毋
庸過遜

賜太中大夫新除吏部尚書周必大辭免兼
翰林學士承旨不允詔

朕閱唐故事翰苑置承旨自鄭絪始凡大誥令大廢
置乃俾專受不責以翰墨之勞也本朝以學士久次
一人爲之秩高體重固不常置卿久在禁林多歷年
所宜峻厥陟用休其勞況綜秉銓衡叙進羣吏亦已

詔卿免凡撰述唯特命始預略如唐制矣金門玉堂方倚君重宜無辭焉

賜資政殿學士通議大夫知紹興軍府事充兩浙東路安撫使李彥穎乞畀一宮觀不允

詔

會稽吾股肱郡也朕選輔臣臨之亦惟知予德意志慮之深藉其推行表倡庶國進退之際詎可輕諸卿秉心安常蹈道醇直自釋政路卽宣外庸仁聲日聞政績時又茲覽需奏願辭郡章朕惟卿精明方昌才力逾劭年穀登稔封圻樂康奚庸告歸卿可坐鎮

賜朝散郎試尚書工部侍郎兼知臨安府吳
淵乞免兼知臨安府不允詔

朕惟官宿其業則易成下習其教則易使凡今小大
之臣布在外服非甚不得已朕不輕易也而況三輔
浩穰四方瞻望政成事著豈庸釋乎卿材資敏明風
力彊濟從容禁路典正行都兵民具安細大畢舉而
乃厭繁倦劇願反印章則豈朕素所選任之望哉規
模旣成條教自洽勉汔乃績稱朕意焉

賜朝請郎降授顯謨閣待制知贛州軍州事
新除在外宮觀留正辭免復顯謨閣直學士

不允詔

朕秉執大柄照臨羣臣謹視過功明用賞罰卿受才
閔達迪德醇明出守輔藩嘗嬰文議起臨江國茂著
政聲屬力請於燕間因盡還於光寵寶儲華閣寓禁
直之凝嚴間館珍臺遂里居之恬養茲由至意寧□
冲懷

賜端明殿學士朝散大夫賜紫金魚袋胡銓
辭免召赴行在乞檢會前累奏許休致不允
詔

朕觀漢李固一日朝會見侍中竝皆年少無大臣宿

儒可備顧問爲之歎異乃知老成在朝誠國之福也
况朕今臨御久長者明凋謝疏觀外服歷數舊臣忠
壯之節早有以激士風正大之言晚有以起朕志維
卿一德茲世幾人瞻焉有懷召以自近而乃輕視軒
冕卽安丘園則豈朕之所望哉年齡雖高精力尚壯
彊爲一起來從吾遊

賜降授明州觀察使張說辭免差提舉臨安
府洞霄宮任便居住不允詔

朕以大中之道待臣下雖近不私雖遠不棄譬之風
霜雨露終歸至仁此者閱諸謫籍閔然念卿之久閑

出於眷懷畀以祠祿卿夙居親近具誠恩慈今優游
家居寓間館珍臺之逸朕之存遇茲云厚矣宜祇成
命無拂深懷

賜資政殿學士通議大夫知紹興軍府事兩
浙東路安撫使李彥穎乞檢會累奏差宮觀
一次不允詔

卿亮直醇明舊維共政朕所嘉尚爲時老成曩辭柄
途遂付闔寄夙夜匪解惠康小民前聞告歸固嘗遣
詔諭眷留之意謂已深識予衷今何嫌而上章又欲
去郡詩不云乎豈弟君子民之父母況卿樂易之政

王堂類集卷之六
甚宜其民克成厥終要以無倦晦明小疹隨當自康
真祠燕間奚必屢請

賜朝散大夫韓彥古辭免除敷文閣直學士
在外宮觀不允詔

華閣輦飛光連天象宸章鱗次寶聚先猷朕今敦勸
臣工審用名器有詔未爽無功不除卿智慮疏通□
資敏給曩備禁途之列獨專邦用之司貨移不及於
公藏贖給自周於常度厥効信矣于今因之念爾去
朝遂投閑而置散顧予待下記豈過而忘勞俾從真
館之遊仍寓清廂之直已乎成命宜略擢章

賜宣奉大夫曾懷辭免除觀文殿大學士提
舉江州太平興國宮不允詔

朕惟仁君不盡人之忠智士不窮已之力均勞逸之
宜則恩義斯厚達進退之節則廉隅乃全卿迪德純
明受材宏裕比延登於揆路實具展於賢猶荐披懇
請之章祈遂燕閒之適已頒丕制俾解繁機躋榮秘
請之崇賦祿真祠之養階六符而成體既居輔弼之
聯陞九級而上廉蓋示始終之遇趣宜祇服毋事多
陳

賜中大夫參知政事姚憲乞就祿祠庭不允

詔

朕舉要萬機責成四輔用舍之間實關於國體動靜之際尤繫於民觀使皆歸潔而自全誰與協謀而共理卿材資開濟識量淵閎自擢預於政塗益具昭於賢業方有猷而告后維既乃心曾何感而上書靡安厥位矧今興起庶治恢張遠圖正當宁汲汲焦勞之時豈大臣紛紛辭避之日亟祇爾服毋咈予懷

賜觀文殿大學士銀青光祿大夫提舉臨安府洞霄宮陳俊卿辭免以郊祀大禮慶成加食邑食實封不允詔

朕練吉天正揭虔陽位靈顧昭假美祥來同迄于有成敢曰能饗固嘗哀神之施覃及內外小大之士眷乃碩輔有勞王家久辟繁機越在外服不獲陪予禮容之盛也肆其均釐朕烏得而忘之卿望崇而益謙位高而愈畏具孚誠悃願還寵章詩不云乎受天之祜四方來賀於萬斯年不遐有佐非吾股肱咸德之舊誰與共此哉勉其祇承毋重多遜

賜朝請郎權吏部尚書兼太子詹事兼侍讀
李彥穎辭免除吏部尚書乞檢會前奏除一
在外官觀不允詔

朕惟常伯之官自古所重選部之事于今實繁以盈
几閣之書付長子孫之吏吏之幸則士必有不幸者
也朕思得其人而久任之卿國之寶臣時之壽俊方
介之資形見議論莊重之質蔚爲羽儀今自典銓之
長進而爲真庶幾式究爾猶使王裴之賢不獨稱□
前世維昔九官之命皆專一職之能于時所謂陟明
者不過爵服之加終不遽易其任若乃其間有卒爲
輔翼者亦其詳試積久而後用也勉體至意毋庸重

陳

賜曾懷再上表辭免除光祿大夫右丞相加

食邑食實封不允不得更有陳請詔

朕惟廊廟據繁機之會朝廷端大化之原必尊重難危自稱陞廉之體維高明有俶乃符夷夏之觀豈其專任以責成遽以被誣而去位卿材猷敏邵智慮淵通蚤簡知於劇煩歷試之初迄登用於名實具孚之後事悉汝翼謀皆予同方共起於治功偶遂辭於授路念此永歎漠然靡圖維斷乃成旣辨霍光之謗□賢罔又卽邈山甫之歸庶幾濟一時事業之隆亦足示千古君臣之盛尙形遜避未諒懷眷惟鼎司之不可暫虛惟渙號之不可復返亟宜祇拜毋重多陳

賜曾懷辭免提舉國史院實錄院國朝會要
所勅令所不允詔

宰相之任無所不統古者上公不以一事名官後世
賢輔亦有衆職兼領厥由舊矣朕詔館閣之士纂修
史錄會聚章程又設有司勒爲大法皆國家一代之
典冊垂示萬世非吾元臣碩德孰與專董振之權哉
卿智能周物儒學承家比嘗盡總於維綱亦旣克成
於端緒茲還舊位庶訖全書且載事貴嚴訟情貴通
皆卿所素講也尚何辭焉

賜資政殿大學士中大夫鄭聞辭免除參知

政事赴都堂治事乞除一在外宮觀差遣不

允詔

朕權內外之勢制重輕之宜經營四方雖資於崇望
總領衆職尤賴於偉圖卿瞻智造微敏才經遠比從
政地往撫坤維忠勤具宜風績采邵與其寬一面之
顧曷若端萬機之原根本旣彊精神自盛靡須歲月
之久式邁其歸實藉謀猷之良同底干道思報國者
固忘勞於原隰懷愛君者亦存意於朝廷虛席以須
義無可避

賜中奉大夫試尚書吏部侍郎兼詳定一□

勅令韓彥直辭免戶部尚書不允詔

周家均賦職于地官漢室理財責在計相今民曹常伯總治調度其位與權不減周漢之重委寄所在疇咨維艱卿識慮博通材猷高邁歷揚煩劇風績卓然荐登禁嚴名聲藉甚比掌銓綜尤稱公平茲用命爾以六官之長典我邦用要使緩急適宜上下均裕錢穀之問不關於朕心是所優爲豈必多遜

賜安慶軍節度使張說辭免除太尉提舉隆興府玉隆觀任便居住加食邑食實封不允詔

太尉古官也國朝以來寵數之隆遂均政路異時非
勲德大臣未易克稱卿夙絲信遇晉預中樞既久閱
於歲時爰浸崇於著位課功責效所冀亟成陳疾抗
章遠茲引避朕用舉掌武之階以超昇之亦云厚矣
尚祇恩意往卽燕閒區區遜辭毋庸重請

賜安慶軍節度使張說上表再辭免除太尉
提舉隆興府玉隆觀任便居住加食邑食實
封不允詔

朕堅持名器躬搯權綱維時爵賞之行罔匪勲勞之
勸迺若班升尉府寵視政塗冠于武階實所甚重□

以昇爾亦知朕所以曲示恩遇之意矣惟恣謹則
斯永惟冲退則身乃休尚服眷私毋庸遜避

崔舍人玉堂類藁卷第六